

Službeni glasnik BiH, broj 67/09

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), a u vezi sa članom 13. Zakona o državljanstvu Bosne i Hercegovine ("Službeni glasnik BiH", br. 4/97, 13/99, 41/02, 6/03, 14/03, 82/05 i 43/09), Vijeće ministara Bosne i Hercegovine, na 94. sjednici, održanoj 16. jula 2009. godine,
donijelo
je

PRAVILNIK O POSTUPKU PRIJEMA U DRŽAVLJANSTVO BOSNE I HERCEGOVINE LICA KOJA SE SMATRAJU OD NAROČITE KORISTI ZA BOSNU I HERCEGOVINU

Poglavlje I.

Član 1. (Postupak i uvjeti prijema)

Ovim Pravilnikom o postupku prijema u državljanstvo Bosne i Hercegovine lica koja se smatraju od naročite koristi za Bosnu i Hercegovinu (u dalnjem tekstu: Pravilnik), utvrđuju se uvjeti i postupak za prijem u državljanstvo Bosne i Hercegovine naturalizacijom lica koja se smatraju od naročite koristi za Bosnu i Hercegovinu.

Član 2. (Kriteriji za određivanje)

(1) Lica koja se smatraju od naročite koristi za Bosnu i Hercegovinu su ona lica čiji su rad i doprinos u oblasti kulture, nauke, obrazovanja, politike, sporta, ekonomije i drugih oblasti od naročite koristi za Bosnu i Hercegovinu.(2) Od naročite koristi za Bosnu i Hercegovinu su ona lica koja su postigla značajne međunarodno priznate rezultate u oblasti kulture, nauke, obrazovanja, politike, sporta, ekonomije i drugih oblasti; takođe i lica koja su potencijalni reprezentativci Bosne i Hercegovine u sportu; kao i lica čiji je doprinos u oblasti kulture, nauke, obrazovanja, politike, sporta, ekonomije i drugih oblasti od značaja za razvoj i prosperitet Bosne i Hercegovine, te međunarodnu afirmaciju Bosne i Hercegovine.(3) Od naročite koristi za Bosnu i Hercegovinu su lica:a) u oblasti kulture, ako od nadležnih institucija imaju relevantna priznanja za svoja djela u državi porijekla ili inozemstvu, odnosno od strane međunarodnih institucija;b) u oblasti obrazovanja i nauke, ako su univerzitetski profesori, ili ako imaju najmanje obrazovanje magistra ili da imaju objavljene referentne naučne radeve iz svoje oblasti;c) u oblasti zdravstva, ako su najmanje specijalisti koji su deficitarni u Bosni i Hercegovini;d) u oblasti ekonomije, ako su vlasnici ili rukovodioci u firmama koje su investirale značajna sredstva u Bosnu i Hercegovinu ili zapošljavaju značajan broj radnika u Bosni i Hercegovini;e) u oblasti sporta, ako su reprezentativci svoje zemlje ili su postigli značajan uspjeh na relevantnim međunarodnim takmičenjima, primjerenih godina starosti, ili sportski radnici koji su postigli značajan uspjeh na relevantnim međunarodnim takmičenjima u svojstvu selektora ili trenera.

Poglavlje II.

Član 3.

(Podnošenje zahtjeva i način provjere i donošenja odluka)

(1) Zahtjev za prijem u državljanstvo Bosne i Hercegovine naturalizacijom, lica koja se smatraju od naročite koristi za Bosnu i Hercegovinu (u daljnjem tekstu: zahtjev) predaje se Ministarstvu civilnih poslova Bosne i Hercegovine.(2) Ministarstvo civilnih poslova Bosne i Hercegovine pribavlja dokaze da podnositelj zahtjeva ne predstavlja prijetnju nacionalnoj sigurnosti i javnom poretku Bosne i Hercegovine, te da mu nije izrečena mjera sigurnosti protjerivanja stranca iz zemlje ili zaštitna mjera udaljavanja stranca sa teritorije Bosne i Hercegovine, te kao obrađivač predmeta, priprema i kompletira dokumentaciju i predmet proslijedi Vijeću ministara Bosne i Hercegovine na odlučivanje o zahtjevu.(3) Vijeće ministara Bosne i Hercegovine donosi odluke o svakom zahtjevu pojedinačno.(4) Bez obzira na ispunjenje uvjeta za stjecanje državljanstva po osnovu ovog Pravilnika, odluka Vijeće ministara Bosne i Hercegovine je diskretionog karaktera i ne podliježe posebnom obrazloženju.(5) U slučaju da se ne prihvati zahtjev za dodjelu državljanstva, Ministarstvo civilnih poslova Bosne i Hercegovine će o tome obavijestiti podnositelja zahtjeva.

Član 4.

(Postupak podnošenja zahtjeva)

(1) Zahtjev za prijem u državljanstvo Bosne i Hercegovine, po osnovu ovog Pravilnika, Ministarstvu civilnih poslova BiH podnosi neposredno lice koje smatra da je od naročite koristi za Bosnu i Hercegovinu.(2) Uz zahtjev se prilaže:a) izvod iz matične knjige rođenih;b) dokaz o državljanstvu zemlje porijekla;c) izvod iz matične knjige vjenčanih, odnosno dokaz o slobodnom bračnom stanju;d) dokaz o prijavljenom boravku u Bosni i Hercegovini;e) preporuku o tome da je prijem određenog lica od naročite koristi za Bosnu i Hercegovinu od jednog od navedenih subjekata:1) Nadležnog ministarstva Bosne i Hercegovine2) Vanjsko-trgovinske komore Bosne i Hercegovine3) Vlade Federacije Bosne i Hercegovine4) Vlade Republike Srpske5) Vlade Brčko Distrikta Bosne i Hercegovine6) Privredne komore Federacije Bosne i Hercegovine7) Privredne komore Republike Srpske8) Olimpijskog komiteta Bosne i Hercegovine9) Registriranih sportskih saveza na nivou Bosne i Hercegovinef) dokaze iz kojih proizilazi osnovanost zahtjeva za prijem u državljanstvo Bosne i Hercegovine.

Član 5.

(Postupak po inicijativi Predsjedništva BiH)

(1) Predsjedništvo Bosne i Hercegovine može dati inicijativu za prijem u državljanstvo Bosne i Hercegovine za lica koja se smatraju od naročite koristi za Bosnu i Hercegovinu.(2) Lice čiji se prijem u državljanstvo Bosne i Hercegovine predlaže na osnovu inicijative Predsjedništva Bosne i Hercegovine uz zahtjev prilaže i dokaze iz člana 4. stav (2) tač. a), b) i c) ovog Pravilnika.(3) Lica primljena u državljanstvo Bosne i Hercegovine na osnovu odredaba iz stava (1) ovog člana, smatraju se počasnim građanima Bosne i Hercegovine.

Poglavlje III.

Član 6. (Evidencije i podaci)

(1) Evidencije lica koja su stekla državljanstvo Bosne i Hercegovine na osnovu odluka Vijeća ministara Bosne i Hercegovine vode se u skladu sa Uputstvom o vođenju centralne evidencije lica koja su stekla državljanstvo Bosne i Hercegovine naturalizacijom ("Službeni glasnik BiH", broj 27/00). (2) Podaci o licima iz stava (1) ovog člana, upisuju se u Centralnu evidenciju lica koja su stekla državljanstvo Bosne i Hercegovine naturalizacijom, koja se vodi pri Ministarstvu civilnih poslova Bosne i Hercegovine.

Član 7. (Prestanak važenja ranijeg Pravilnika)

Stupanjem na snagu ovog Pravilnika, prestaje da važi Pravilnik o postupku prijema u državljanstvo Bosne i Hercegovine lica koja se smatraju od naročite koristi za Bosnu i Hercegovinu ("Službeni glasnik BiH", broj 38/06).

Član 8. (Stupanje na snagu i objavljivanje Pravilnika)

Ovaj Pravilnik stupa na snagu narednog dana od dana objavljivanja u "Službenom glasniku BiH".

VM broj 174/09 16. jula 2009. godine Sarajevo

Predsjedavajući Vijeća ministara BiH

Dr. Nikola Špirić, s. r.